



HEINRICH TIMMEREVERS

DRJEŽDŽANSKO-MIŠNJANSKI BISKOP

Drježdžany, 13. januara 2020

Lube sotry a lubi bratřa,

z přenim adwentom je so w katolskej cyrkwi w Němskej a z tym tež w Drježdžansko-Mišnjanskim biskopstwje Synodalny puć oficialnje zahajił. Kónc januara wotměje so přenja wulka synodalna zhromadźizna w Frankfurće, tež ze synodalemi z našeho biskopstwa.

Podpěruju wuraznje tónle puć a přeprošuju ludži w našim biskopstwje, zo bychu sobu po nim šli. Synodalny puć budže w štyrjoch forumach wuradźować. Temy rěkaja:

1. Móc a dźělenje mocow w cyrkwi – zhromadnje so na póstanju cyrkwy wobdźeleć a na nim podźěl brać
2. Lubość w poradženych počahach – lubość w seksualnosći a partnerstwje
3. Měšniska eksistenca džensa
a
4. Žony w službach a zastojnstwach cyrkwy.

Zhromadnje so prašamy: „Što praji nam Bóh džensa?“ To je najwjetše napinanje, kotrež měli zmištrować. Trjebamy wulku wotewrjenosć. Kajke budu jeho wuslědki, njemóže džensa nichtó rjec. Njejsym při tym bojzliwy, přetož dowěrjam tomu, zo w synodalach a w zhromadnych wuradźowanjach křćenych a firmowanych Boži Duch skutkuje.

Mi je to z wosebitej naležnosću, zo so hódnotna perspektiwa a wuznamne nazhonjenja katolskeje cyrkwy we wuchodoněmskej diasporje do tohole procesa zapřijmu. Z našich měnjatych stawiznow a před horicontom aktualnych towaršnostnych wužadanjow mamy drohotny pokład nazhonjenjow. Jako křescanki a křescenjo móžemy so poskićić jako duchowni aktiwisća, zo bychmy druhich wukmanili, zo bychy tući swoje dwěle a nadźije ze słowami zwuraznić zamóhli. Při tym nochcemy wěru nanuzować, ale ju jako horicont wułożowanja poskićeć – runje tam, hdžež ma identita so wosobinsce a towaršnostnje nowa zatožić. Tule widžu bytostny přinošk našeho hłosa w Synodalnym puću cyrkwy w Němskej.

Synodalny puć ma wot wšeho spočatka wysoku dynamiku. Hakle kónc zašeho lěta je so wujasnić móhło, kotři synodalojo z našeje diecezy so w rozdžělnych funkcijach wobdžěla. Sym dżakowny, zo je so z knjenju Martinu Breyer (pósłana wot Centralneho komiteja katolikow Němskeje a předsydku našeje rady katolikow), z knjezom profesorom Eberhardom Tiefenseejom (pósłany wot měšniskeje rady w Drježdžansko-Mišnjanskim biskopstwje), z wosadne referentku Steffi Hoffmann (pósłana jako zastupjerka Duchownych zhromadženstwow a Cyrkwinskich hibanjow), z direktorom akademije dr. Thomasom Arnoldom (pósłany wot Centralneho komiteja katolikow Němskeje) a ze mnu pječ synodalow našło, kotřiž so na předwidžanych synodalnych zhromadžiznach Synodalneho puća ze swojim hłosom wobdžěla.

Lube sotry a lubi bratřa, nimo wosobinskeho kontakta k synodalam móžeće hižo nětkole swoje rozmyslowanja, měnjenja a namjety k wuradźowanju zdžělić. Sekretariat Synodalneho puća je k tomu w interneće na stronje www.synodalerweg.de formular zarjadował. Te zapřijmu so potom do džěla a do wuradźowanja synodalneje zhromadžizny a jednotliwych forumow.

K pohłubšenju a zjimanju naležnosćow Synodalneho puća w našej diecezy steji dr. Christian März jako diecezanski přistušny partner poradźujo k dispoziciji. Tuchwilu koncipuja w našim biskopstwje regionalne zarjadowanja, na kotrychž so temy Synodalneho puća předstaja a hłasy z našeho biskopstwa synodalam posrědkuja. Wo tym bórze wobšěrnišo informujemy.

Moja wulka próstwa je, zo stajnje so synodalnosć w cyrkwi džeń a bóle realita a zo sej tutu zhromadnosć přiwučimy. Bamž Franciskus rěči wo synodalnej cyrkwi, kotraž je „připostuchaca cyrkej“, a to „kóždy sluchajo na druheho a wšitcy w Duchu Swjatym“ (z narěče bamža Franciskusa k swjedženjej 50 lět wutworjenja biskopskeje synody). Moja wulka próstwa přesahuje tohodla zhromadne wuradźowanja a rozmyslowanja: Modlmy so wo Ducha Swjateho za puć cyrkwy w našim biskopstwje, w Němskej a na swěće!

A handwritten signature in blue ink, reading "+ Heinrich Timmerevers". The signature is written in a cursive style with a cross at the beginning.

+ Heinrich Timmerevers

Drježdžansko-Mišnjanski biskop